

Jermin Bell

*“Ta remarcabel locual mi curason sa,
asina cu mi mente lag’e na paz” -
Rosabelle Illes, Wholism (2012)*

Texto: Rudolfo Dirks
Foto: Robin de Vogel

Jermin, un persona no desconoci den e mundo di arte y poesia, un hoben estudiante residencia na Den Haag, Hulanda, autor di e buki ‘Nameless’ recientemente a haci su debut. Un buki yena cu inspiracion skirbi completamente pa e autor hoben aki. Actualmente Jermin ta finalizando su estudio den ‘Psychologia’ na Hogeschool van Amsterdam.

Nos di Focus a sinta y combersa cu e hoben autor aki, pa haya sa kico a inspira su persona pa cumisa skirbi.

‘E inspiracion pa skirbi a bin un atardi ora cu mi tabata tin 13 año.’ Tabata su prome dia di *summerschool*, unda cu su docente a pidie, pa introduci su mes na e klas y bisa kico tur tabata su hobynan. El a splica e docente y e klas, cu e ta encanta pa conta di su isla y cu e ta gusta skirbi. E docente a bira completamente entusiasmo y a cuminsa conta cu su casa tambe ta gusta skirbi. Jermin tabata kiermen literalmente skirbi e letranan den forma bunita. **‘Mi no a coregi mi docente, paso mi a encanta su reaccion.’** Ora cu el a yega cas bek for di scol, el a dicidi di bay skirbi un carta na Dios. Den e carta aki, cu el a duna e titulo “Why?”, el a puntra Dios, dicon el a kita su mama for di dje y diferente otro pregunta tocante di morto y di bida en general. **‘Mi no tin recoleccion di e preguntanan aki, paso mi a kima e carta como simbolo cu mi a post e carta pa Dios. Despues di algun dia mi a cuminsa ripara, cu mi tabata haya e frasenan bunita den mi mente y mi mester a skirbi esakinan riba papel. Mi a ripara cu nan tabata e contestanan riba mi preguntanan. Pues asina mi inspiracion a bini pa skirbi y te ainda mi ta haci esaki.’**

Actualmente Jermin ta finalizando su estudio. E decision pa continua skirbi mas buki ta keda habri, debi cu Jermin ta skirbi a traves di inspiracion. **‘Mi ta wordo**

guia door di inspiracion. Pues si mi haya inspiracion pa publica cualkier otro buki of proyecto, mi lo haci esaki.

“Nameless” ta Jermin su promer buki publica. Den pasado Jermin a colabora den e Wholism calendar 2012 cu e luna di september.

“Nameless” ta un inspiracion cu el a haya for di un ser hopi keri. **‘Mi a lag’e lesa algun di mi scrituranan y el a bisa mi, cu mi tin cu publica un buki. Mi di cu ne cu: “E ta loco y cu e scrituranan aki ta pa ami personalmente.’**

Pero e idea di publica un buki a keda planta den su mente y curason. Jermin a laga varios hende lesa su scrituranan, anto nan tabata dun’e bon feedback y nan tabata wordo inspira. **‘Mi a wordo convenci door di tur e contestanan cu mi a ricibi, ta e informacionnan cu tur hende rond mundo por uza pa biba inspira.’**

Jermin ta conta cu **“Nameless”** no ta un titulo comun. **‘Ora cu mi a dicidi pa publica Nameless, mi di cu mi mester un titulo. Mi no por a pensa riba un titulo cu ta gara tur e temanan di Nameless.’** Nameless ta parti den tres categoria: Romance, Identidad y Spiritualidad. Jermin no kier a bay duna e buki un titulo, ora cu el a comenta e idea aki na un amiga autor di dje, Rosabelle Illes. E di cu ne cu: “Esey berdad ta arte, pero con hende ta bay logra haya bo buki?”.

‘Pues mi a dicidi di conecta cu mi curason y e inspiracion cu mi a haya ta e titulo cu awe ta Nameless. E ta un titulo cu no ta un titulo.’

Por ultimo nos a puntra Jermin con leu e kier yega den bida, **‘Jermin kier inspira amor den tur curason. Paso amor ta inspira.’**